

道德真經廣聖義卷之十七

羊六

道德真經廣聖義卷之十七

羊六

唐廣成先生杜光庭述

大道廢章第十八

散此章明風俗頹靡道失則仁義遂
行禿施鬚而病求醫雖云由愈數米
炊而簡髮櫛何其傷性故直舉八句
將以明其積弊冀速返於淳古也○

義曰前以淳樸漸散澆薄繼生原其
澆薄之由乃彰道德之廢步者安徐
於皇化驟者趨急於帝功俗靡風頹
仁興義作執仁義而飾性立刑賞以
訓人亦由既禿而加鬚求妍已病而
求醫望愈矣淮南子曰數米簡髮煩
而不察有為之甚也何異乎以膝搔
背以踵解結矣能明四者之非可致
還淳之望也鬚髮也頹
壞也靡傾也櫛梳也頹

大道廢有仁義

注澆淳散樸大道不行曰仁與義小成遂
作濡沫生於不足凋弊起於有為然則聖
人救代之心未嘗異而夷險之跡則不得
一爾

羊六

疏大道廢者代俗澆漓人民浮競玄風斯
泯穆清之化不存失夫至道無為之事故
云廢也

義曰廢者陵替不行也皇道帝風陵頽已
遠興王圖霸譎詐交馳時既遷訛情惟浮

競玄深宴安之風日以泯滅穆和清靜之
化日以銷平大道不行斯為廢矣禮運云
大道既隱天下為家是也澆沃也漓者水
入地也淳古之質如水沃地散不可收故
云澆漓也

疏廢則有兼愛之仁裁非之義蹶躅於其
間矣

義曰蹶躅為仁強行兼愛之貌也蹶踈為
義詐立裁非之貌也皆局促其狀勉強其
容非廣大也去道日遠聖跡已彰仁義不

真禮樂離性徒得其強飾之形表皆非自然真一之誠心也

疏故莊子曰道隱於小成小成謂仁義等各自其成不能大通故謂之小成

義曰大道既隱上德亦墮仁者自仁義者

羊六

三

自義不能混然同化各成一名方之於德固以小矣況於大道乎道隱小成者莊子齊物篇南郭子綦謂子游曰道於乎隱而有真偽言於乎隱而有是非道於乎往而不存言於乎存而不可道隱於小成言隱

於榮華此謂小成仁義之道也榮華竄句
之辭也執言滯教故為隱故有儒墨以是
其所非以非其所是以此紛紜莫能質定
亂由是而作焉

智慧出有大偽

注用智慧者則將立法也法出而姦生則
有大偽矣并竊符璽可不信然

疏智慧出者謂後代之人役用智慧立法
以檢俗制典以詰姦恐其不信作符璽以
信之恐其不平為斗斛以量之而不仁之

人兼盜符璽并竊斗斛則夫智慧之作法
適足侈大其詐偽故云有大偽矣

義曰智心慧也慧識解也檢束約也詰責
也符信也璽印也道德隱而仁義行仁義
興而智慧用法繁於秋荼網密於凝脂而

羊六

三

人愈亂也夫弓弩畢弋機變之智多則鳥
亂於其上矣鈎餌網罟罾罟之智多則魚
亂於水矣削格羅落罟罝之智多則獸亂
於澤矣智詐漸毒頡滑堅白解詬同異之
變多則俗惑於辯矣故天下每每大亂罪

在好智矣法則也謂立法則以束於人也
典常也姦詐也謂作常法以詰責姦詐也
符者刻文相合以驗若金虎竹使兵信之
符也璽者天子曰璽諸侯曰印上下等差
以為信也斛之所起起於圭六十四黍為
圭十圭為抄十抄為撮十撮為勺十勺為
合十合為升十升為斗五斗四升曰斛所
以量物也智慧之人設此符印斗斛之法
將以限量拘制以驗其盜安知不為大盜
之積者乎田常矯仁義於齊國一旦弒其

君而竊其國傳十二世齊之符璽斗斛聖
智之法皆田常有之是則智慧作法而生
此大偽其後竊國者往往因田氏之法焉
王莽竊之於漢司馬宣王竊之於魏梁武
帝竊之於齊隋文帝竊之於周豈若焚符
破璽而使民樸鄙掎斗折衡而使民不爭
殫殘天下之聖法而民可以議於道乎

六親不和有孝慈

注父子夫婦兄弟六親也踈戚無倫不和
也各親各子有孝慈也皆由失道故有偏

名也

疏六親者父子兄弟夫婦也夫大同之俗無自私之親及乎上下不和冤恩斯起則有扇枕溫席人謂之孝

義曰大道之世天下為公無非親也澆末

卷六

四

之代六紀有辨孝慈彰也有不慈則慈者著焉有不孝則孝者顯焉天下為公則大同之俗也冤屈折也恩惠愛也扇枕溫席者宋有劉苞字孝嘗三歲而孤其伯父慘等皆顯貴苞見之常泣母陳氏疑其畏憚

而怒之苞曰白慈早不識父今見諸父相
似心中悲爾因獻歛母亦悲慟苞奉其母
夏則扇枕冬則溫席焉孝者事親之名禮
祭統曰孝畜也釋名曰孝好也謚法曰至
順曰孝總而言之則事親之道恒畜在心
盡其色養中情悅好承順無違之義也爾
雅曰善事父母為孝也
疏出顧入復謂之慈被孝慈之名有自矜
之色殊不知大道之代天下為家上承下
綏自然之分視人如己不獨親其親則天

下之人皆可孝也人亦視之猶已不獨子
其子則天下之幼皆可慈也孝慈之名復
何所施乎

義曰禮運篇云仲尼仕魯與於蜡賓事畢
遊象魏之觀見祭禮之不備覩象魏之舊

羊六

五

所喟然而歎弟子言偃問焉仲尼曰大道
之行三代之英丘未之逮也而有志焉大
道之行天下為公選賢與能講信脩睦人
不獨親其親不獨子其子使夫老有所終
世有所用幼有所長鰥寡孤獨廢疾者皆

有所養男有分女有歸貨惡其棄於地不
必藏諸已力惡其不出於身不必為己是
故謀閉而不興盜竊亂賊而不作故外戶
不閉是謂大同此則扇枕溫席出顧入復
無所施矣人盡親也何偏名之有乎矜恃
也哉

國家昏亂有忠臣

注太平之時上下交定何異名乎昏亂之
日見危致命有忠臣矣

疏忠者人臣之職分而云有忠臣者何乎

由人主失御臣之道令佞主之人獲進規
君於昏使生禍亂則有見危致命蒙死難
以匡社稷而獲忠臣之名

義曰謹正曰忠春秋曰忠社稷之固也為
臣事君以忠為本事親孝者則事君忠矣

阿諂曰佞不明於理曰昏上下不理曰亂
夫佞臣在側君鑒不明不能退佞進賢陷
已於昏亂昏亂既作紛爭生焉外有寇敵
之侵內有蕭牆之釁所以良臣效命排難
扶危或生著功名或死節王事忠臣之目

由斯立焉向使唐堯為君虞舜為臣上得
臨御之宜下盡弼諧之道則忠臣偏美何
所顯哉

疏若夫道化大行無為清靜思皇多士盡
是夔龍舜倫攸叙無非作又

羊六

六

義曰大道之化玄風廣行上既無為下自
清靜詩曰濟濟多士文王以寧多士衆臣
也夔龍舜佐也尚書曰夔作典樂八音克
諧擊石拊石百獸率舞簫韶九成鳳凰來
儀龍為納言出納王命舜法也倫等也攸

所也叙次也又理也書曰彛倫攸叙言舜
得良臣而典法不失其正也

疏然後忠孝之名息淳樸之道興則於忠
臣乎何有此四者頽弊之極也焉得不返
之於淳樸乎

義曰頽墮也弊替也四者謂仁義智慧孝
慈忠臣也道廢智生家爭國亂而四者是
顯因頽弊之極而立其名大樸壞隳淳風
訛替德衰道喪可勝言哉所以大道既隱
下德有為仁義用而巧智興小惠成而大

偽作忠臣名著於昏亂孝慈事彰於不和
弊極風頹所宜反樸反樸之謂詳具在於

下章

絕聖棄智章第十九 疏前章明風俗
頹靡失道而仁

義遂行此章明絕棄多門還淳則盜
賊無有首六句且絕矜徇之迹次三

羊六

句將明立教之方後四句示行門之
由趣○義曰道廢俗訛偏名遂立將
復樸素須絕偏名既前章四者不行
則此章三者宜絕孝慈自復盜賊不
生乃尊朴素之風除私欲
之患天下之利其何博哉

絕聖棄智民利百倍

注絕聖人言教之迹則化無為棄凡夫智

詐之用則人淳樸淳樸則巧偽不作無為
則矜徇不行人抱天和物無夭性是有一百
倍之利也

疏聖者有為制作之聖智者凡俗矜徇之
智制作之聖則有迹矜徇之智則非真失
真是生巧偽逐迹坐令喪本故皆絕棄之
而全其淳樸天和既暢矜徇不行是人有一
百倍之利也

義曰無為之聖內明之智應物周徧隨時
感通比之聖智杳冥無迹制作之聖矜徇

之智既有其迹人往迹存以所存之迹非
應變之具執而用之去道愈遠何者聖智
設法所以守國也大盜至矣則聖智之法
并其國而竊之其故何哉若不盜其聖智
之法則無以取其國是知聖智設法本以
守國智詐極矣乃翻為盜國之盜資也老
君戒之忘聖則為理涉迹則為亂能忘其
有迹之迹棄其矯智之智則淳樸復而巧
偽息矣人復怡和無傷無夭俗臻樸素無
怨無爭各保其生是有百倍之利也

絕仁棄義民復孝慈

注絕兼愛之仁棄裁非之義則人復於大
孝慈矣

疏前章云大道廢有仁義此章云絕仁棄
義民復孝慈者明大道之代所謂玄同民

羊六

無私親悉皆慈孝故理至則迹滅事當而
名去矣

八

義曰六親不和則孝慈之名偏立天下有
道則淳樸之化復行淳素既行人皆慈孝
可謂無私親矣斯則絕名迹之仁義復玄

同之孝慈無私親者是不獨親其親也
疏今六紀廢絕則孝慈名彰若絕兼愛之
仁棄裁非之義江湖無濡沫之迹慈孝有
自然之素故民復於大孝慈矣

義曰六紀者亦曰六親是君臣父子夫婦
也六者和則皆孝皆慈六者不和則有孝
有不孝有慈有不慈不孝者衆則孝者顯
其名不慈者衆則慈者彰其美所以然者
仁義制於其間而昭其名迹若化之以大
道鼓之以淳風棄名迹之仁義則民復於

皆孝皆慈矣魚處於陸相响以濕相濡以沫不如相忘於江湖何者相响相濡言其相愛矣相忘於江湖各得其適豈俟濡沫之小愛乎偏孝偏慈濡沫之謂爾莊子天運篇老子謂孔子曰子以仁義之道行之

羊六

九

於世亂莫大焉夫仁義憖然乃憤吾心豈若使天下無失其樸放風而動總德而立又奚桀桀然若負建鼓而求亡子矣黑白之樸不足以為辯名譽之觀不足以為廣魚相濡沫不如相忘於江湖人相仁愛不

如相忘於道術矣

絕巧棄利盜賊無有

注人矜偏能之巧必有爭利之心故絕巧則人不爭棄利則人自足斯不為盜賊矣疏絕巧者絕雕琢非法淫過之巧棄利者棄徇財兼并乾沒之利夫盜賊者生於羨欲不足今絕巧則人不爭棄利則人自足人各自足復誰為盜賊乎故云無有

義曰雕琢淫過之巧工既不當雖巧奚為則衛人之刻棘猴宋人之琢楮葉徒云悅

目終曰蕩心所宜絕也徇財則妨行兼并
則奪人乾沒則欺詐有一於此非盜而何
斥而棄之循分而足矣何盜賊之有乎又
脩道之人宜絕心內嗜欲之巧身外浮華
之利六情銳進之巧六根耽著之利則三
元清淨六賊自無矣

此三者以為文不足故令有所屬

注此三者但令絕棄未示修行故以為此
文不足垂教更令有所屬著謂下文也

疏三者謂絕聖棄智一也絕仁棄義二也

絕巧棄利三也此三者且今絕棄未有修
行故以為此三者於文不足以垂教更令
有所屬著謂下文見素等是也

義曰聖智絕棄則人享其利仁義絕棄則
皆復孝慈巧利絕棄則民無盜賊三者既

羊六

十

絕既棄將示修真復古之方故云此為未
足屬於下文屬著也

見素抱樸少私寡欲

汪見真素抱樸少私邪寡貪欲矣

疏欲求絕聖棄智則常見真素

義曰同乎無欲則謂素樸素樸則民性得
矣無知無欲則合真素真素合則聖智之
迹絕矣

疏欲求絕仁棄義則懷抱質樸

義曰淳質敦樸以守其心則兼愛之仁裁
非之義絕矣

疏欲求絕巧棄利則當少私邪寡貪欲

義曰私邪不汨於性貪欲不起於心則淫
奢之巧專冒之利絕矣

疏三絕雖於文不足四行則修身有餘將

欲禁邪於中心故必取資於內行

義曰聖智仁義巧利此六者行之初以拯物執之末以妨道故姦詐盜竊因而生焉絕而棄之可復真素真素已復乃資內修顯四行於結成為真道之要妙矣夫有迹

羊六

十一

之聖作則矜詐之智生仁起於不仁義出於不義孝彰於不孝慈顯於不慈能絕有迹有為自復至慈至孝斥淫巧則私利息私利既息盜賊不生然後凝旒於樸素之鄉杜念於私欲之境人登富壽國致遐長

此人君行道之效也若夫心除嗜欲身蕩
浮華翦銳進之情鋤耽著之本六賊不作
三元坦夷四行克修久視何遠此行人修
之之效也

道德真經廣聖義卷之十七



